

INERTIAM FUGAT

VIGILANTIA DOCTA

DISSERTATIO
MEDICA INAUGURALIS,
DE
MOTU MUSCULORUM.

QUAM,
ANNUENTE DEO TER OPT. MAX.

Ex Auctoritate Magnifici Rectoris,

D. FRANCISCI FABRICII

S.S. TH. DOCT. HUIUSQUE FACULTATIS, UT ET ORATO-
RIAE SACRAE, IN ACAD. LUGD. BAT. PROFESS. OR-
DIN. SOCIET. REGIAE ANGLIC. DE PROMOVENDO
EUANGELIO IN PARTIBUS TRANSMARINIS SO-
CII: NEC NON ECCL. LEIDENSIS PASTORIS:

UT ET

*Amplissimi SENATUS ACADEMICI Consensu,
& Nobilissimae FACULTATIS MEDICAE Decreto,*
PRO GRADU DOCTORATUS,

Summisque in MEDICINA Honoribus & Privilegiis
ritè ac legitimè consequendis,

Publico ac solemnì examini submittit

FRIDERICUS WINTER, Udemia Clivensis.

Ad diem 15 Junii horâ locoque solitis 1736.



LUGDUNI BATAV

Apud

JOHANNEM LUZAC

F. v. Bleyswyck

inven & fecit.

*VIRIS CELEBERRIMIS, EXPERIENTISSIMIS,
PRAECEPTORIBUS SUIS FIDELISSIMIS,
SUMMOPERE SUSPICIENDIS.*

D. HERMANNO BOERHAAVE,
A. L. M. PHILOS. ET MED. DOCT. SOCIETATUM
REGIARUM PARISINAE ATQUE BRITANNI-
CAE MEMBRO, MED. ET COLLEG. PRACT.
PROFESSORI, COLLEG. CHIRURG. PRAESIDI.

D. HERMANNO OOSTERDYK
SCHACHT,

A. L. M. PHIL. ET MED. DOCT. EJUSQUE
THEOR. PRACT. ET COLLEG. PRACT. PRO-
FESSORI, ILLUST. PRAEPOT. ORD. HOLLAND.
AC WESTFR. COLLEG. THEOLOG. MEDICO,
COLLEG. PHARMAC. PRAESIDI, PROMOTORI
HONORATISSIMO.

D. BERNHARDO SIEGFRIED
ALBINO,

MED. DOCT. ANATOM. ET CHIRURG. PRO-
FESSORI.

D. ADRIANO VAN ROYEN,
MED. DOCT. EJUSQUE AC BOTAN. PROFES-
SORI, SOCIET. REGIAE LONDIN. SOCIO.

D. HIERONYMO DAVIDI GAUBIO,
MED. DOCT. MED. AC CHEMIAE PROFES-
SORI.

D. JACOBO WITTICHIO,
A. L. M. PHILOS. DOCT. EJUSDEMQUE FACUL-
TATIS, UT ET MATHESEOS PROFESSORI,
AVUNCULO SUO, AD SUPREMUM VITAE
DIEM COLENDO.

*Hocce studiorum suorum specimen,
ea qua decet reverentia, sacrum
facit*

A U C T O R.

D I S



DISSERTATIO MEDICA
INAUGURALIS,
DE
MOTU MUSCULORUM.

§. I.



Orpus animale organicum esse, & quidem ex partibus pluribus, itidem organicis, connexione sua varia, fini totius inservientibus, compositum, unusquisque, rei Anatomicae duntaxat parum peritus, perspectum licet habeat, ignoratur tamen partium plurimarum usus, nec non, quomodo ad eos aptae existant, ratio: est saltem multarum tantummodo probabilis. Harum partium imprimis numero, quum Musculi summo cum jure accensendi sint, quorum uti usus, motus scilicet animalis, per Musculos tanquam instrumenta peragendus, satis evidens; sic contra illius & possibilitatis & existentiae ratio, non, nisi prorsus incerta, adhuc detecta fuit: variae interim a variis siquidem excogitatae prostant sententiae, ex multis maximè verisimilem, pro virili adstruere est animus.

§. II.

Jam vero Musculus quum sit pars organica nostri corporis,

possibilitas autem actionum, in corpore animali dictarum functionum, ex Organorum intelligatur structura, qualisnam eadem in Musculis existat, primo loco mihi inquirendum erit.

§. I I I.

Prolixus tamen ero nequaquam in describendis Musculis, prout statim ac fuerint detecti, oculis nostris sese exhibent: Etenim habitus proprius parti unicuique nostri corporis, atque diversus, aegrè exprimitur verbis, & ipsis potius est cognoscendus oculis. Memoro saltem breviter, plerisque in Musculis, duas inprimis occurrere partes, habitu externo inter se diversas; alteram constituere medium carneum, alteram vero tendines, carnea partis fini utrique, nec non partibus oppositis vicinis, & movendis & fixis, annexos. Vocarunt verò Anatomici & Physiologi, aliter distinguentes, *Ventrem* partem Musculi mediam carneam; *Caudam* autem extremum illud, quo affigitur parti ei, cui movendae a natura praecipuè destinatus; *Caput* denique extremum alterum, quo connexus est parti respectu prioris fixae. Notandum interim est obiter, Caudam atque Caput non semper pro tendineis haberi debere, quum Musculi alii tendinem altera tantummodo parte, alii utrimque, alii in medio longitudinis suae habeant, imò & reperiantur Musculi carnei, rubri toti (a).

§. I V.

Inquirendo accuratius in carnem Musculorum, apparet, constare illam ex fasciculis oblongis, teretibus, rubicundis, fibris dictis; conflari has porro ex fibrillis minoribus, & has rursus ex minoribus quidem, similibus tamen in omni examine, & nudis adhuc oculis, conspicuis. Pervenit tandem sagax ac indefessus naturae Scrutator LEEUWENHOECKIUS (b) ope microscopiorum eò usque, ut maxima cum probabilitate dixerit, fibrillam musculosam sextodecuplo tenuiorem capillo, componi iterum vel ex trecentis ejusmodi minoribus: quid quod credibile admodum
fit,

(a) Vid. Cel. Albini, Praeceptoris mei summè venerandi, *Hist. Musc.* L. I. C. I. (b) Vid. *Epist. Physiol.* passim.

fit, minimas hasce adhuc compositas existere, ratione interim determinante finem, quandoquidem necessaria omnino sint stamina quaedam ultima, quorum adunatione facta, reliqua omnia nascantur. Observatum est porro, singulas tales fibrillas, ne minimis quidem exceptis, circumvestiri membranulis, arctè adnexis, atque demissis propaginibus fibrillas omnes inter se colligantibus: hasce cellulosas esse, imò ortas ex productionibus membranae cellulosae, investientis totum corpus, & implentis spatia aliàs exstitura vacua, nec non connectentis partes inter se omnes, egregiè sanè ostendit Cel. ALBINUS (c); easdem autem nequaquam differre ab iis, quas observavit LEEUWENHOECKIUS, satis superque confirmant globuli pinguedinosi visi subindè ab Eo in membranulis hærentes.

An vero fibrillae continuo tractu a Capite ad Caudam pertinent, atque longitudine sua aequales sunt longitudini Musculi ipsius? id certè non videtur: observavit saltem Cel. ALBINUS (d) fibras saepissimè inter se, sive conjungi, sive saltem arctissimè cohaerere. Ut adeo verisimile sit, ex fibrillis minoribus multis, extremis oppositis sibi invicem concretis agglutinatisve, unam longiorem majoremque componi; cujus simile quid in sphincteribus atque spiralibus Musculis obtinere observamus.

§. V.

Descriptis jam fibris secundùm longitudinem porrectis, unà cum modo connexionis earum inter se, commemorandae quidem nunc essent fibrillae transversae tendinosae, vel nervosae aliis, oriundae, juxta mentem omnium ferè Anatomicorum, a membrana Musculorum externa propria, penetrantes dein versus interiora, directione fibris reliquis planè opposita. Verum enimvero falluntur, ut credo, omnes qui tales sibi imaginantur fibrillas, quum longitudinalibus illis fibris, praeter vasa, membranamque cellulosam §. IV. nihil unquam intertextum reperitur: dum interim erroris causa fortè fuerit membrana dicta cellulosa, fibras connectens, distracta, vel quod vasa inanita col-
lap-

(c) In *Hist. Musc.* L. I. C. I. (d) Ibid.

lapſa, vel denique fibrillæ Muſculorum longitudinales, ſæpiſſimè inter ſe coherentes, diſcerptae, ſub fibrillarum tranſverſarum ſpecie impoſuerint non ſatis cautis harum partium Scrutatoribus. Idque ſanè adhuc magis confirmatur ex eo, quod membrana Muſculorum externa propria, unde fibrillae illae oriri dicuntur, nulla prorſus exiſtat, niſi cellulosa, uti clarè oſtendit pinguedo, in obefis loco tunicæ, inveſtiens Muſculos, & continuatione quadam interſerta fibrarum fasciculis.

§. V I.

Tendines ſimili planè modo ac carneae partes §. IV. ex fibris componuntur minoribus, iisdemque ortis ex ruriſus minoribus, continuatis autem fibrillis carneis, nec niſi colore, ſiſcitate atque tenuitate ab iis diſtinguendis; ſic ut fibrae tendineae ex carneis oriri videantur, raritate duntaxat carnea in denſitatem majorem quaſi compacta. Connectit autem fibras tendineae partis, quoque inter ſe, membrana cellulosa ſubtilior tamen & magis parca.

§. V I I.

Vaſa ad Muſculos pertinentia, ſunt vel nervoſa, vel arterioſa, vel venoſa, vel denique lymphatica. Arteriae ad Muſculos dum accedunt, & ſe hiſce immergunt, abeunt in ramos, pererrantes primùm flexu vario atque multiplici tunicam cellulosaſam, diſcurrentes deinde, ubi tenuiſſimi facti, per omnes fibras, atque, præterquàm quod multi in membrana cellulosa jam evaneſcant, in fibras ipſas ſe poſtremò demittere videntur (d*). Ulterius quid fiat determinatu eſt impoſſibile; etiamſi Eximius COWPERUS (e) ſe inveniſſe ſcribat, arteriarum miniſtiſſimos ramulos in fibrillas Muſculorum minimas patere, ſiquidem injectus Mercurius in fibrillarum poris inſtar globulorum appareret: etenim ſciendum eſt, per vim injiciendo adhibitam, vel rumpi potuiſſe vaſa tenerrima, vel Mercurium per

(d*) Vid. Cel. Albin. loc. cit. (e) Vid. Manget. *Theatr. Anat.* L. I. C. 4. p. 16.

per vasa lateralìa patentia transire , atque sic utroque in casu , in folliculos tunicae cellulosaë effundi , ibique sub globulorum forma apparere : adde quod Mercurius , qui in frigore , ut cera , majorem non acquirit consistentiam , si in hac vel illa parte vasis , major a quacunque causa oriatur pressio , statim globulos formet , atque hoc modo in vasculis tenerrimis , fibras mentientibus , haerens , experimenti eventum dubium valdè reddat. Venae eodem penè modo se habent ac arteriaë : Nec vasa lymphatica in Musculis peculiare quid , prae aliis in reliquis corporis partibus , contemplantibus exhibent. Nervos quod attinet , hi frequentissimè carneam partem , rarius tendineam adeunt , ad exemplum vero vasorum procedentes , ramosiores facti citius evanescent , subtilitate non assequenda ullo molimine.

§. V I I I.

Exposui quæ hætenus de Musculorum fabrica nobis certò innotuere : Utinam hæc sufficerent intelligibili modo explicandæ eorundem actioni , id quod sanè exinde nullo modo possumus. Ad probabilia igitur confugiendum erit , ubi certa desunt : id autem ut fiat , optimum erit imitari Artifices , quibus si conficiendum detur Automaton quoddam , ad certos motus aptum , v. gr. Horologium ex arte sic parandum , ut præter horas , simul motum Solis atque Planetarum indicet , Artifices illi Horologio vulgari applicant alia ipsis ex mechanicis cognita , componuntque dein partes omnes , quæ ritè combinatae inter se , motus illos præscriptos determinent. Eodem ergo modo & Nos progrediemur , recensendo prius Phaenomena , circa motus Musculorum observata , ut pateat non solum , quid præter jam cognita , ulterius in fabrica supponendum restet , verum etiam quomodo in Musculis se habeat Principium activum , in organo quocunque necessarium , ut actu existant motus per fabricam possibiles.

§. I X.

Motus animales , qui præcipui sunt effectus actionis Musculorum , fieri observantur , dum Musculi breviores , duriores fa-

B

cti ,

cti, partes annexas trahunt: haecque eorum actio, Medicis vocatur vel *Contractio* simpliciter, vel & *Contractio vitalis*: ut distinguatur ab actione illa non adeò magna, qua decurtantur Musculi, etiam in Cadavere, post tractionem violentam sibi rursus commissi, & appellatur *Contractio propria*, atque pendet a vi elastica majori vel minori, insita partibus solidis, corporis animalis, ferè omnibus.

Status Musculorum laxus, mollis, subsidens, quoniam Contractioni est oppositus, eamque sequitur, facit, ut Musculi, cessante contractione, dicantur *relaxari*, vel *restitui*.

§. X.

Proprium contractionis Instrumentum constitui per fibram quamcunque minimam singularem, & ratio suadet, & experimenta confirmant in fasciculis minoribus, qui etiam si compositi adhuc existant, partes tamen sunt Musculorum majorum. Interea vero licet Experimentis iis, quae a STENONE (f) & WILLISIO (g), istius rei probandae gratia, instituta fuere, fidem omnem derogare nolim, puto tamen Viros illos doctissimos, observare sibi visos fuisse, quae revera non apparuere: atque ut temerè me hoc ita proferre quis haud existimet, & simul ratio dubitationis meae constare possit, dicam & modum quem Viri isti in experiundo adhibuere: Sumserunt nimirum canem vivum, & dissecta Musculi cujusdam membrana propria, separaverunt fasciculum quendam fibrarum a reliquis cum eo connexis fibris, sic ut duntaxat, utrisque suis extremitatibus, tendinibus cohæret, hocque peracto, quum observaverint motum contractilem, qui supererat, perhibuerunt quod, eadem penitus ratione, brevior sit factus fasciculus, a contactu fibrarum mutuo liberatus, ac antecum intra membranam Musculi, tanquam intra thecam communem, continebatur: at quid? tentavi idem, omni cautione adhibita, & simili plane modo, ac ab Illis factum esse legitur, ut

(f) Vid. *Element. Myolog. Spec.* p. m. 75. (g) In *Exercitat. de motu Musc.* adjecta ipsius *Pathologiae de Affect. Hyster. & Hypoch.* p. m. 31.

ut quoque ipse viderem Contractionem vitalem in fasciculo separato, quemadmodum in Musculo integro, adhuc superstitem; sed frustra, licet Contractio superstes propria Incauto facile imponere potuisset: Nec mirum certè fibras separatas atque solutas evadere flaccidas, mortuas, quum discindendo tunicam cellulosam connectentem, simul scindantur nervi & arteriae fibris motum impertientes. Magis certum est Experimentum captum a Cel. ALBINO: sumitur scilicet Gallus Indicus major; huic, uno ictu, gladio abscinditur caput, retrahit se pellis, & apparet in Musculis denudatis, motus quidam irregularis & tremulus, modo hac modo illa fibra se decurtante; argumento evidenti, inesse singulis fibris seorsim consideratis, facultatem separatim & distinctè se contrahendi: Similia prorsus huic Experimento, commemorat & STENO, a se visa esse in Diaphragmate, Corde, Musculis abdominis, atque in aliis quibuslibet. Confirmant praeterea veritatem dictorum Observationes LEEUWENHOECKII: vidit Hicce fibras Musculorum ad microscopium minimas, in animalibus maximis, easdem prorsus esse cum iisdem, quae reperiuntur in minimis insectis; nec nisi numero fibrarum, differre Musculos animalium majorum, ab iisdem qui sunt minorum: quare quum minima quaecunque etiam sint insecta, motu non minus gaudeant ac vastissima animalia, utique concludere licebit, non solum, minimam quamcunque fibrillam vi contractili esse praeditam, verum etiam Musculos mole maximos, tantum ope vis illius, quae inest fibris suis minimis, contractionem edere posse. Atque haecce causa fuit, quare Musculos a fibris simplicibus musculosis, variis in variis corporis partibus, non distinxerim, quum sanè omnium, quatenus motus animales cient, par omninò sit ratio.

Caeterum, licet huc propriè non pertineat, tamen hic loci adnotare simul breviter juvat, quoniam ex antecedentibus sufficienter intelligi potest, sententia saepius jam memorati STENONIS; qui explicaturus modum Contractionis vitalis Musculorum, in suo *Myologiae Specimine*, assumit fibrillarum ductu obliquo tendinibus connexarum (uti videre est in figuris *loc. cit.*) tensionem, absque novo accedente corpore, pulchrè tamen re-

fitatus a BORELLO in Libro ejusdem *de Motu Animalium* part. 1. prop. 5. Fuere postea & multi existimantes commodè perquam, negotium efficiendi contractionem in Musculis, corrugando scilicet fibras longitudinales, deferri posse fibrillis transversis, antea §. V. commemoratis, alii interim alio modo explicantes earum agendi rationem: Singulorum referre nomina, opinionumque diversitates, operae sanè pretium non est, imprimis quum deficientibus hisce fibrillis, simul sponte sua corruant omnium his superstructae Hypotheses; praeterquam quod idem BORELLUS (h), ejusmodi operandi facultatem similibus fibrillis transversis, etiamsi adessent, jam dudum denegaverit, utpote quae agere deberent viribus absolutis, aequalibus ferè movendo ponderi; id quod absurdum, & reliquis consuetis naturae agendi rationibus minus consentaneum videtur.

§. X I.

Ligato, abscisso, vel quocunque modo corrupto nervo, ad Musculum tendente, quum pereat contrahendi facultas, uti unicuique notum est, nervi autem partibus suis, in quibus distribuuntur, nullum alium praestent usum, nisi, quod hodie satis evictum habetur, afferendo spiritus, patet evidenter ad motum musculorum illaesum requiri, non solum fabricam integram, verum & influxum liberrimum spirituum; sive hi agant impetu & copia, sive qualitatibus suis propriis motus producant: Esse autem praeterea hos spiritus, Principium activum proximum, ad existentiam contractionis requisitum, judicatur exinde, quod Musculi siquidem ad voluntatem agant, nulla alia via, nisi per nervos spirituum ope, mandata a cerebro accipere possint. Rescissis interim Musculorum arteriis, vel alio modo cohibito per easdem sanguinis fluxu, non minus ac ineptis redditis nervis, cessat motus, & oritur paralyfis partis; unde itaque & sanguinis arteriosi influxus haud impeditus ad motum muscularem necessarius cognoscitur.

§. XII.

(h) In Lib. *de Mot. Anim.* part. 2. prop. 9. & seqq.

§. X I I.

Intellectis nunc quoque phaenomenis, quot instituto sufficere videntur, tempus erit determinare ulterius, convenienter & fabricae cognitae & phaenomenis recensitis, requisita in Musculis, ut ad usus suos apti evadant: quo ipso autem ad tria potissimum respici posse videtur; quomodo scilicet Musculi 1°. notabiliter decurtari; & 2°. brevissimo temporis spatio rursus restitui possint; 3°. denique quomodo minima cum vi haec peragiqueant.

§. X I I I.

In superioribus §. X. quum evidenter constiterit, propria contractionis Instrumenta constitui fibrillis minimis, ex quarum compositione atque numero aucto totus conflatur Musculus; adeoque nequaquam in constructione Musculi, quatenus ex partibus minoribus constat, integri, latere rationem motus; verum, quod eleganter demonstravit Eximius BORELLUS, ex constructione eadem pendere duntaxat robur absolutum, vel majus vel minus, quo inter se invicem, caeteris paribus, differre observantur Musculi quicunque; adeò, ut vires se habeant ut multitudines fibrarum; magnitudines elevationum, flexionumque in articulis vero, ut earundem fibrarum longitudines: patet igitur, ut opinor, satis manifestè, in eo duntaxat cardinem negotii verti, ut fabrica assignetur vera fibrae ultimae, qua ejus ad contractionem intelligatur aptitudo; tum demum causa exhibeatur certa, quae contractionem per fabricam possibilem actu existere faciat.

Hunc ergo in finem si consulamus, quae demonstrantur a Mechanicis, invenimus nulla arte promptius ingentia pondera suspendi, quam ope vesicularis machinae, ab elastica quadam vel alia fluida quacunque materia, distentae: testatur id Experimentum Oxoniae institutum & recensitum a Cel. WALLISIO (i), ubi visum fuit, hominem inflando vesicam, sustulisse huic ap-

B 3

pen-

(i) In *Mechanic.* cap. 15. prop. 3.

penſum 70 librarum pondus: quum enim aliis in machinis, quibus reſiſtentiae ſuperantur maximae, vel vis activa ſit multiplicanda, vel tempus augendum, in machina veſiculari & vis parva & tempus impenditur breviffimum. Haec itaque qui bene perpendit, & ſimul cogitat vires enormes Muſculorum & ferè incredibiles exhibitae nobis a BORELLO in elegantiffimo ſuo Libro *de motu Animalium*; tum porro conſiderat tenuiffimos, qui primùm movere debent, nervos §. XI., motus celeritatem ſummam, reſtitutionem citiffimam; mecum credo ultrò fateri cogetur, maxima cum probabilitate affirmari, fibrillas Muſculorum ultimas, dividi amplius impotes, cavas eſſe, & tempore contractionis, a materia, qualiſcunque illa ſit, diſtendi; imprimis cum Hypotheſis haecce, inferius adhuc magis limanda, omnium maximè non ſolum conveniat cum ſtructure Muſculi jam detecta, & reliquis omnibus in corpore animali obviis, verum etiam optimè ſerviat explicandis phaenomenis plurimis in ſequentibus adducendis.

§. X I V.

Poſitis jam cavis fibrillis, requiritur porro ut determinetur modus, quo inflentur: in eo autem detegendo, multi quum deſudaverint Egregii Viri, juvat afferre opiniones eorum praeſcipuas. Experimenta §. XI. a nobis adducta, quibus conſtitit, neceſſarium ad contractionem Muſculorum eſſe influxum ſpirituum & ſanguinis arterioſi, anſam dedere multis, explicandi fibrillarum diſtentionem per efferveſcentias, a mixtione ſanguinis cum ſpiritibus nervoſis, ortas: Primus horum, quantum novi, fuit Egregius BORELLUS, cujus deinde opinionem correxit Cel. JOH. BERNOULLI ſtatuendo fibrillas ex veſiculis ſeu cellulis conſtare, ſpiritus autem nervorum ſpiculis ſuis ſubtiliffimis, ad modum quem propoſuit Oriſi litterario in *Differt. de efferveſcentia & fermento*, diſfringere particulas ſanguineas, & ſic exitum dare aëri concluſo tenuiori, qui ſui juris factus, ſeſe quaquaverſum expandendo, primo impetu produceret veſicularum & proinde Muſculi totius inflationem, erumpendo autem per poros, Muſculum rurfus detumefcere faceret. Credat qui nescit ſpiritus eſſe tenuiffimos

simos & simplicissimos, nequaquam autem spiculis cujuscunque sint generis armatos (k).

Hujus deinde similem Hypothesin postea nobis tradidit Praestantiss. KEILIUS, aculeos spirituum cum vi attractrice permutans duntaxat; putat quippe particulas sanguinis, vi attractrice partium suarum componentium, qua ferantur in mutuum contactum, inclusum tenere aërem, liberandum deinde suo carcere per spiritus, vi majori attrahentes partes illas constituentes particulam sanguinis, momento vero post, recondendum rursus intra globulos, ex adunatione nova spirituum, cum particulis sanguineis ortos. Commentum egregium sanè, in quo, ut & in Hypothesi praecedenti, quamplurima ex arbitrio tantum assumpta, & quae nullis prorsus nituntur argumentis, occurrunt; atque ut praeterea de vi attractrice in genere non dicam, non respondet quoque opinio haecce observationibus habitis in cruore, qui ex vena emissus per quietem in sua elementa resolvitur, utpote quibus, claustris licet refferatis, nihil unquam aëris deprehensum fuit: taceo quod difficillimum non solum sit intellectu, sed & gratis prorsus & absque ulla ratione dicatur, quod bulla aërea, prius sanguinis globulo inclusa, nunc libera, cingatur rursus a particulis illis novis ex commixtione spirituum cum sanguine ortis, eisque per vim attractricem iterum includatur, ut Musculorum promoveatur restitutio.

Sententiam aliam praecedentibus longè quidem meliorem, attamen quoque non verisimilem, proposuit Cl. DAN. BERNOULLI (l), qui supponens structuram in minimis esse talem, ut fibrillae in longitudinem porrectae, cavae, cylindricae, *sanguine turgidae*, quarum una sit A B, circumdantur hinc inde, sub annulorum specie, C D, E F, G H, a fibrillis Musculorum transversalibus, *nervosis, cavernosis*; contractionem absolvi contendit, si annuli ex fibris transversis oriundi, in suis

Fig. I.

ca-

(k) Vid. Cel. Boerhaavii, Medici summi, Praeceptoris mei aeternum colendi, *Inst. Med.* §. 277. (l) In *Comment. Acad. Petropol.* Tom. I. p. 297. & seqq.

cavernulis a succi nervosi copia impleti magis, minores facti, in magnitudinem *c d*, *e f*, *g b* contracti, angustent longitudinales fibras, spatium inter annulos medium, per sanguinem contentum intumescere faciant, formam cylindricam in convexam aliam *c d e f*, *e f g b*, mutant, fibras integras breviores reddant. Contraria huic Hypothesi est fibrillarum transversarum nervosarum absentia §. V., fortè & accurtatio Musculorum major quam unius quintae partis totius longitudinis, quae tamen sub hac hypothesi, ipso Cl. BERNOULLIO demonstrante, maxima est, quae fieri possèt.

Recensenda denique hic loci quoque venit sententia, praecedenti haud absimilis, Cl. DE GORTER, proposita nuperrimè in suo *Compend. Medicin.* part. 1. Tract. 18. Repraesentat sibi Hicce fibras minimas, ultimas, longitudinales, tanquam cylindros cavos, ex arteriis ortos, sanguine plenos, & dum Musculus est laxus situ recto atque parallelo locatos; decussari autem eos & perreptari a fibris transversis, *nervorum propaginibus*, *Musculo quiescente semiplenis & flexis*, sic ut texturam quandam aemulentur: His positis, putat decurtari Musculum, si fibrae transversae impleantur magis, affectent rectitudinem, compri- mant in punctis tangentibus fibras arteriosas longitudinales, atque ex cylindro, quemadmodum in Hypothesi DAN. BERNOULLII, faciant veliculas plurimas. Refellitur haec sententia pariter per ea, quae notavimus in proximè antecedenti; quibus accedit argumentum adhuc aliud, quod infra §. XXIII. occurret, utri- que Hypothesi adversum: taceo quod tensio Musculorum, & proin (si existant) fibrarum longitudinalium arteriosarum, non adeo magna deprehendatur, absque ea autem, complicatio laterum, per fibrillas transversas, ad modum praedictum, facienda, haud benè concipi queat; quid quod verendum sit praeterea, ne vires per fibrillas transversales exercendae, si ad calculos revocentur, hac ratione nimis magnae requirantur.

Vidimus jam opiniones multorum, & si omnes referre animus esset, restarent certè adhuc plurimae; ne autem taediosus evadam, transeundum potius mihi esse censeo ad ea, quae ipse adstruere & pro virili defendere suscepi: id autem ut fieri que-
at,

at, prius determinanda erit propiùs vera fibrarum ultimarum cavarum structura, atque earum cum nervis motum producentibus connexio.

§. X V.

Huic autem proposito quum inserviat egregiè, & ut clarè explicentur omnia conducat admodum, cognitio accurata nervorum fabricae, in ea vero penitissimè cognoscenda, siquidem operam maximam quondam collocaverit Oculatiss. RUYSCHIUS, non inconsultum quoque fore existimavi, ut describerem simul hac occasione modum, in scrutanda nervorum structura, ab eodem adhibitum, prout eum aliquandò exposuit frequenti suo Auditorio Cel. BOERHAAVIUS. Elegit itaque sibi Cl. RUYSCHIUS istum in finem, ni fallor, caudam equinam medullae spinalis ex infante, hancce ex nervis minoribus quamplurimis instar fibrarum se habentibus compositam, maceravit paululùm in aqua, sumsit deinde fibras quasdam seorsim sibi examinandas, easque acubus subtilissimis secundùm longitudinem discerpfit, atque discerptas jam aliquoties, rursus agitavit in aqua, divisit eas dein ulterius, & repetiit eadem cum patientia incredibili, donec tandem eò subtilitatis pervenerit, ut si halitus ore vel naribus efflatus allideret solummodò leviter ad praeparandum objectum, crisparentur omnia & turbarentur, nec distincti quid contemplationi relinqueretur; sic ut tandem coactus fuerit, clypeo quodam papyraceo naribus atque ori apposito munire objectum, istudque in liquore tantùm suspensum tractare subtilissimè; quibus operationibus denique ad taedium usque repetitis, apparuit congeries fibrillarum minutissimarum, distinctarum omninò & arte separatarum duntaxat; quemadmodum & similis praeparati nervi figura exstat in Ejusdem *Thes.* 3. *Tab.* 4. *fig.* 4; praeparato interim ipso, de quo dixi, cum multis aliis a Cl. RUYSCHIO ad Potentissimum Russiae Imperatorem missò, id quod tamen minus dolendum hodiè, quod plures ejusdem generis praeparationes nitidissimas & pulcherrimas servet Cel. ALBINUS, a se ipso factas, & quas in Collegio Ejusdem quo Anatomiam subtiliorem tradit, Auditoribus suis exhibitas vidi.

Adeo ut tam hinc quam ex aliis argumentis adhuc multis, hic tamen non recensendis, abundè satis constet, quod Nervi omnes ad Musculos videntes, ex fibrillis componantur minoribus, & ferè infinitè parvis, disjunctis atque distinctis omninò, ut videtur, toto tractu ab ortu usque ad finem; factis autem fibrillis hac ratione, quemadmodum per examina anatomica ulterius constitit, ut fibrae medullares extra cerebrum & medullam spinalem protractae investitae sint membranis, quarum elastica una & tenax a dura matre, altera tenuior a pia matre & membrana Arachnoidea oriunda; atque proin fibrillae tales plures nervum constituent majorem, dum connectuntur inter se per tunicam cellulosa, vasis omnis generis stipatam. Sic itaque factus est truncus ex nervis infinitis minoribus constans; qui dum ad Musculum pervenit, secedunt rursus fibrillae & dividuntur, ut dictum est §. VII., prout vero rami, dividendo semper fiunt minores atque minores, sic observatur simul, nervos quoque tenuiores, molliores, minusque tenaces quodammodo evadere. Haecce nunc omnia si comparentur cum iis, quae stabilivimus §. XI. XIII. fibras nempe ultimas existere cavas, tum porro nervos continere Principium activum motus, seu per eos deferri contrahendi vim; prout certè est credere, nervorum fibrillas, ubi finem invenerint, & proinde tenuissimae maximèque molles factae fuerint, expansione quadam, abire in tubulos, dilatabiles, cavos, fibrillas Musculorum minimas, in easque suis extremis patere; adeoque musculorum omne esse nervosum: cui sententiae non obstat, uti quidem primo intuitu videtur, magna nimis Musculorum moles, quum haecce ferè tota fiat, ex copia pinguedinis, humorumque cum suis vasis, quae omnia si demerentur, moles certè quam minima superesset; prout apparet in Phtysicis, quibus pellis ferè ossibus haeret, & tamen motus satis promptè fiunt: analoga haec omnia potius sunt fabricae musculosae in minimis insectis, microscopiis vix conspiciendis, & nihilominus aequè celeriter, ac vastissima animalia se moventibus: imò & optimè praeterea convenire videntur iis, quae de ortu animalium & eorum constructione ex meris nervis, adeò eleganter annotavit Cel. BOERHAAVIUS in *Instit. Med.* §. 440.

§. X V I.

Pervenimus eò usque ut cognoscantur stamina prima musculosae Carnis, sed quid sunt Tendines tandem? credimus hos fieri sic, ut fibrillae memoratae §. praec. ad extrema sua compactiores, densiores, angustiores, minus dilatabiles factae, formant principia tendinosa, quae in fasciculos collecta tendinem conspicuum constituent. Consentanea haec sunt tum cognitis de iisdem & descriptis §. VI. tum phaenomenis & observationibus, quibus constat, tendines in contractione breviores non reddi, sed eosdem manere ad sensum; carnosae vero partes contractionibus creberrimis & compressionibus ad ossa factis, in tendineas mutari deprehenduntur; adde quod inveniantur fibrae hic carneaе, ibi autem tendineae rursus; id vero fieri posse, optimè concipitur, si fibrae eadem in suis cavitatibus, hinc inde angustiores, siccioresque, contra aliis in locis iterum magis dilatabiles & laxiores existant.

§. X V I I.

Intellectis his omnibus, difficile non erit, rationem reddere contractionis vitalis §. IX. Musculorum: sufficit Principium activum primum in cerebro, ut incognitum nobis assumendum in omni hypothese, movere spiritus, ut majori cum celeritate a prima origine versus Musculos fluant, sicque aucta quantitate, distendant fibrillas §. XIII. XV., latitudinem augeant, longitudinem minuant: fieri id posse celerrimè, intelligitur, quia spiritus dum naturaliter, atque motu non accelerato, influunt, & proin vires Musculorum in perfecto sunt aequilibrio, vi tamen aliqua nitantur agere & distendere fibrillas; probat hoc quippe contractio Musculorum articulos flectentium, dum contra voluntatem a vi externa fit artuum flexio: Phaenomenon enim illud, observatum primùm in Deltoide a GLISSONIO, non totum pendere a contractione propria §. IX., id quod objici posset, patet manifestò exinde, quod Musculus Biceps brachii, si cubitus extensus in homine, flectatur ab alio, intumescendo aliquantum, tres circiter digitos brevior fiat, quum tamen idem

Musculus, in cadavere discissus, nequaquam tam multum se contrahere deprehendatur. Expertus hoc est Cel. ALBINUS in hominibus laqueo extinctis, quibus cum semper brachia flexa arctissimo vinculo constringantur, suspicio esse nequit, fibras per distractionem fortè aliquam perdidisse tonum, quum is contra in his hominibus, partim ex flexione diuturna, partim vero ex frigore, quod ubi post mortem accedit, vim contractilem fibrarum, per causam antecedentem mirè jam auctam, adhuc magis crescere facit, maximum potius incrementum capere debuisset. Quod vero spiritus secundum naturam perpetuò influentes, vi aliqua distendendi fibrillas, praediti esse possint imò debeant, id evincit copia eorum omni momento secretorum (m.). Atque hinc patescit simul 1°. Antagonistarum Musculorum necessitas & officium; tum 2°. quod necessariò impletæ esse debeant ex parte fibrillae; flaccescentibus licet Musculis, dum interim sanguis, in vasis fibris undique circumpositis, contentus pressione sua impedit, ne fibrae eadem distractione laterum extrorsum luxurient nimis.

Caeterum clarum esse videtur, quod flexo membro per suos flexores, & proin elongatis extensoribus Musculis, angustari debeant horum fibrillae, minus plenae reddi, dimittere spiritus per vias inferiùs indicandas.

Restat examinandum accuratius, quamnam formam debeant habere fibrillae, ut actio earum phaenomenis exactè respondeat. Quaeritur ergo an sint vesiculares, an uno tractu factae? Judicium optimè ferri posse videtur, ex magnitudine contractionis sub forma utraque possibili: prius itaque tentandum erit an determinare experiundo possimus, quantum se contrahere Musculi queant, ut conferendo dein cum iis, quae demonstrata a Mathematicis prostant, qualisnam forma requiratur, pateat.

§. X V I I I.

Ad inveniendam contractionem Musculorum maximam, Experimentum quoddam instituit Cl. DAN. BERNOULLI (n), quod,

(m) Vid. Cel. Boerh. *Inst. Med.* §. 278. (n) In *Comment. Acad. Petropol.* Tom. I. p. 304.

quoniam singulare valdè est & elegans, hic appono: „In plano
 „verticali, inquit, duxi lineam horizontalem bm , in cuius extre- Fig. II.
 „mitatibus b & m affixi utrobique chartulam characteribus no-
 „tatam, dein in eadem ab horizonte altitudine inquisivi, locum,
 „in quem oculum dextrum (clauso sinistro) ponere possem, ita
 „ut in utraque chartula characteres distinguere valerem immoto
 „capite, sed moto bulbo oculi, modo versus internum modo
 „versus externum canthum. Locum autem sollicitè exploravi
 „proximum, quantum fieri posset, lineae bm ; omni porro,
 „qua poteram, vi oculum detorsi in utramque partem, curans
 „ut in neutram partem inclinarem caput, tandem exactissime
 „locum detexi: Dicam quid invenerim. Repraesentet circellus
 „ $c d f e$ sectionem horizontalem bulbi in eodem plano cum linea
 „ bm . constitutam, sitque linea op perpendicularis in linea bm ,
 „inveni $op = 7$, $bp = 8$, & $pm = 6$, ibi cum oculus con-
 „stitutus erat poteram detorquendo oculum pro lubitu in u-
 „traque chartula characteres distinguere, at appropinquando ca-
 „put tantillum versus p , in neutra distinctio apparebat, & de-
 „clinando caput in alterutram partem motu parallelo cum bm
 „in altera Schedule distincte in altera confuse apparebant cha-
 „racteres. Ut intelligatur, quid ex isto experimento sequatur,
 „ad duo attendendum est; 1°. quod oculus dum in orbita sua
 „movetur, ipsius centrum o immotum maneat; 2°. quod in re-
 „tina sive, ut alii volunt, in choroïdea unicus sit locus puta
 „ q , in quo distincte imaginem percipimus, qui ferè pupillae n
 „oppositus est. Ut itaque objectum in b distincte videamus,
 „requiritur ut locus q perveniat in f seu n in c , hicque motus
 „fit ope musculi adducientis $b \propto g$, extenditur autem simul ipsi-
 „us antagonista seu abducens $a \propto g$, & si abducens agit, quan-
 „tum potest, pervenit punctum q in d seu n in e , extenditur-
 „que musculus adducens: ergo dum oculus movetur v. gr. a c
 „in e dimidium motus fit a restitutione musculi abducientis, re-
 „liquum ab ejusdem contractione, invenitur autem angulus b
 „ om ex trigonometricis esse 89 grad. 26 min. ejusque dimidius
 „ $44^\circ. 43'$. dicendum ergo musculum abducientem maxima sua
 „contractione rotationem producere in oculo $44^\circ. 43'$. totidemque

„alterum adducentem. Porro praedicti muscoli $a s g$, $b x g$ in-
 „feruntur bulbo oculi haud procul ab iride puta in a & b , cum
 „eodemque uniti sunt usque in s & x , ita ut $g s$, $g x$ fere tan-
 „gant circulum, observavi etiam esse $s g$ vel $x g$ ad diametrum
 „bulbi fere ut 20 ad 9; ex his datis haud difficulter inferitur,
 „quanta sit maxima abducentis contractio, fumatur nimirum
 „arcus $s t$ $44^{\circ} 43'$. & ducatur $g t$, erit $g t$ ad $g s$ proxime ut 9
 „ad 11. hincque sequitur maximam muscoli abducentis contra-
 „ctionem esse aequalem $\frac{2}{11}$ seu paulo minorem quinta longitudi-
 „nis naturalis parte.

Miror sagacitatem in inveniendis hujus Viri prorsus singula-
 rem, dubito tamen an quinta illa circiter longitudinis pars pro
 contractione summa haberi possit, ut enim non dicam de diffi-
 cultate magna experimentum dictum instituendi, nec de requi-
 sita cognitione accurata decursus Musculorum atque connexio-
 nis eorum cum bulbo oculi, quandoquidem praeterea experi-
 mento eodem modò recensito, determinetur duntaxat contra-
 ctionis magnitudo, quanta in corpore animali actu existit, &
 ad quam Cl. Autor fortassè quoque solùm respexerit, dubitandi
 etiam locus semper restat, annon contractio, in Musculis iis,
 major possibilis fuisset, nisi obstaculum praebuisset vel pingue-
 de, vel nexus bulbi oculi cum partibus vicinis; cujus rei ex-
 emplum constat in Massetere, qui certè brevior multò reddi
 posset, nisi obstaret firma nec cedens maxillae inferioris ad su-
 periores applicatio.

Considerandum nunc venit quoque illud quod observatur in In-
 testinis; Haec saepius pluribus in locis adeò contracta reperta fuere,
 ut penitus carnosae viderentur, nec ullum fere vacuum super-
 esset, contrà verò in aliis locis a flatibus sic dilatata, & tunicas
 eorum sic tenues factas, ut mirum omninò esset. An ergo dicen-
 dum, vim contractilem tunicae musculosae tantum valere, ut in-
 testinis adeò dilatatis ad tantam angustiam iterum redigendis par
 sit? Profectò si strictè pro contractione vitali §. IX. fumatur,
 eam nequaquam tanta vi pollere censeo; sed arbitror potius
 Intestina, dum primò intercipitur flatus, distendi parum, resi-
 stere tunicam muscularem vi suae contractionis vitalis, hanc
 postea

postea, per distractionem evacuatis fibrillis musculosis §. XVII., superari, elongari fibras, tenues reddi, interim tamen per vim elasticam resistere pressioni fortiori; hac sublata, contrahi rursus intestina ope contractionis fibrarum propriae §. IX. eousque, ut spiritus denuò implere possint fibrillas, redire sic contractionem vitalem, hanc perficere reliquum. Sanè si quis secum reputet, naturam ad partes eas omnes, ut circa arterias, ubi nimia verenda erat dilatatio, Musculos posuisse non molles, rubicundos, sed corii instar tenaces, elasticos valdè, facilè mihi largietur credo, rationem datam non videri improbabilem. Nec certè plus probat, hoc quod ipse vidi, ante biennium in Theatro Anatomico, Cel. ALBINO demonstrante, Ventriculum puta sic mirum in modum contractum, ut existimem illius fundum ne ovum columbinum quidem capere potuisse; erat autem in foemina, quae dum viveret, potibus spirituosissimis maximopere indulserat, nec fortè, ut potatores ferè solent, multum cibi assumerat, quibus itaque causis fortassè factum fuit, ut per vim constringentem atque indurantem spiritus vini, maxima copia ingesti, ventriculus primò multum coarctatus, deinceps verò per cibos non expansus iterum, tam mirè constrictus apparuerit.

En omnia, quantum scio, quae aliquid de magnitudine contractionis docere possent, ex quibus vero licet nihil certi determinari queat, patet tamen contractionem satis magnam esse, etiamsi non tanta sit ac quidem primo intuitu videtur; fortè quod sit paulò minor una tertia parte totius longitudinis. Ratio cur major haberi nequeat, est haecce, quod fibra quaecunque cava, ubi per distentionem a liquido factam, in sphaeram conversa fuerit, sicque capacitatem omnium maximam acquisiverit, de sua diametro longitudinali, quam antea habuerat, (posito nimirum quod fibrae latera non elongata fuerint) nil amplius amittere, adeoque, prout §. XX. clarius apparebit, circiter una tertia parte duntaxat brevior evadere possit. An autem in Musculis diversis contractio quoque (salvis tamen modò dictis) obtineat magnitudinis diversae? fortè suspicari quis posset.

§.XIX.

§. XIX.

Adeamus nunc Mathematicos, visuri quaenam, sub forma fibrillarum diversa, contractionis sit ratio.

Primus omnium, qui post BORELLUM, calculum mathematicum ad Musculorum motus applicando, egregii aliquid praestitit, & aliorum circa hanc rem industriam rursus excitavit, fuit Cel. J. BERNOULLI; Hicce enim in *Dissertatione de motu Musculorum* conscripta, postquam sub hypothese sua de vesicularum existentia, lateribus cavernularum a pressione fluidi cujusdam distendendis, contra BORELLUM, curvaturam arcui circulari similem assignaverit, ad calculos simul magis accuratos revocavit, tum vires vesiculas dilatantes, pro resistentiis quibuscunque superandis, requisitas, tum magnitudines elevationum, singulas adhibitas vires, sequentes: uti haec videri possunt in *Tabella* Dissertationi ejusdem commemoratae addita. Hunc qui sequutus est Praestantiss. KEILIIUS (in *Tentamine suo Medico-Phys. de motu Musculorum*, quod correxit deinde Cl. MICHELOTTI *Animadversionibus* quibusdam seorsim editis, adjectis autem una cum *Dissertatione* memorata Cel. BERNOULLII, Libro illius de *Separatione Fluidorum* conscripto) pauca tantum addendo, servavit ferè omnia, demonstrata a BERNOULLIO, & sic confirmavit. Post Eum vero Cl. PEMPERTON in *Introductione* a Praecl. RICHARDO MEAD praefixa *Myotomiae reformatae* COWPERI, BERNOULLIUM ideò, quod existimet, non benè ab Eo definitam esse curvam pro vesicularum lateribus, erroris accusare, & proin curvam aliam, a circulari illa planè diversam determinare voluit: cujus circularis curvaturae tamen *Apolo-giam* scripsit ad HERMANNUM Cl. MICHELOTTI; atque postea Praecellentiss. Jo. POLIENUS (o), licet alio scopo, Experimentis comprobare tentavit calculos Cel. BERNOULLII: Conficiendas scilicet sibi curavit laminae tenues, angustas, multas, aequales, extremis suis jungendas sic, ut mobiles ad invicem mancant; composuit ex illis catenam ellipticam, dilatabilem; superposuit hanc

(o) Vid. in *Fasciculo Epist. Mathem. Epist. ad Abbat. Guid. Grandum.*

hanc mensuræ oblongæ, sic factæ, ut tum extremitatibus catenæ, tum ubique ad ejusdem latera, appendi possint pondera, interim tamen non magnus attritus fiat : invenit tandem, ubi perfectum inter pondera obtineret æquilibrium, angulos ad juncturas laminarum, a tractione ponderum factos, esse inter se omnes æquales ; quod cum sit proprium duntaxat circulo, ut si polygonus æqualium laterum ei inscribatur, anguli a lateribus comprehensi singuli prodeant æquales, calculum a BERNOULLIO ritè subductum fuisse pronuntiavit. Litem inter Clarissimos tales Viros componere, quum nec spatii angustia permittat, nec scopus præsens postulet, imprimis quum in genere conveniant, & non nisi parva intercedat differentia, sequar in sequentibus, ubi opus erit, BERNOULLIUM, ut sic ejus *Tabula* superius memorata simul uti possim ; accedit quod illius sententia confirmari videatur experimento POLENI.

Antequam verò pergam necesse videtur prius examinare modum quem exhibere conatus est, idem, de quo jam sermo fuit, Cl. PEMPERTONUS, ad judicandum de verisimilitudine structuræ vesicularis fibrarum : Putat quippe egregiè id fieri posse, si modò constaret prius quanta, vi hypotheseos, sub certa magnitudine contractionis, intumescencia esse deberet vesicularum, & proinde totorum Musculorum, ut postea videri possit, an eadem cum observationibus concordet. Hunc igitur in finem animadvertit primò variam obtinere posse vesicularum formam, pro majori vel minori possibili Musculorum contractione, & quidem si fibris adscribenda esset contractio, omnium quæ fieri queant, maxima, vesiculas convenire perfectas A B C D, te-
 nuissima duntaxat parte inter se coherentes, in sphaeras inte-
 gras commutabiles ; sin vero minor tantum requireretur con-
 tractio, sufficere cellulas E F I K, I K L M, L M G H, basi
 ampliori sibi invicem coherentes, & factas sic ex fibra tota,
 ut hæc instar cylindri cavi in partes distinguatur per ligamenta
 transversa, cavitatem totius non multum arctantia ; ita ut post
 inflationem factam oriatur figura qualis est N O P Q R S T V.
 His præmissis, pergit secundum suas, ex natura curvæ, pro
 vesicularum lateribus, ab Eo determinatæ, magno cum apparatu

D

ma-

mathematico demonstratas propositiones, investigare, quantum augeri debeant cavitates fibrarum, & proinde toti Musculi, si ad certum gradum contractionis imminui ponatur longitudo; finem tandem facit, & rem in medio relinquit, quum neget ullo experimento, tantum saltem si ullum, constare incrementum Musculorum, ac quidem sub dicta hypothese vesicularum necessarium foret. Verum enimvero nec ideo existentia vesicularum in fibris negari debere videtur, quum vel sibi ipsi difficultates multas moveat, impediens non solum incrementum requisitum, sed & quae reddant difficile certum de augmento iudicium: veluti 1°. quod multum interspersum sit Musculis, molem quidem in statu laxo augens, sed inflationis non capax, uti pinguedo, vasa, nervi; 2°. ex contractione totius Musculi, statui non posse de contractione vesicularum, nisi prius directiones fibrarum sint notae; 3°. denique comprimi cellulas fibrarum inter se, quum non sint laxè sibi invicem colligatae: quibus autem meritò annuero illud, quod vesiculae, flaccescentibus licet Musculis, ut aliquatenus distentae considerari debeant §. XVII., quas tamen Cl. PEMPERTONUS pro collapsis omninò habet: quid quod si vesicularum existentia in dubium vocari debeat ideo, quoniam vel nullum vel saltem parvum tantummodò, observatur incrementum Musculorum, eodem certè jure, atque ob eandem rationem, dubitari quoque posset de fibrarum cavitate ipsa, quippe quum posita eadem cavitate fibrarum, earumque distentione per liquidum aliquod, nullis autem positis vesiculis, necessariò major contingere debeat intumescencia, quam sub vesicularum hypothese, prout §. seq. patebit; adeoque & huc referri mereantur argumenta adversus GLISSONIUM §. XXV. allata.

Haecce omnia qui fusius explicata examinare cupit adeat ipsam *Myotomiam reformatam* COWPERI anno 1724 editam; quam etiam ipse dum legi, miratus praeterea sum maximopere errorem ab eodem PEMPERTONIO Mathematico caeteroquin valdè insigni commissum, dum iniquè penitus carpit meritissimum BORELLUM, & negat veram esse propositionem ab eodem in Libro suo doctissimo *de motu animalium* part. 1. prop. 30. de-

demonstratam , quod scilicet funis altera extremitate clavo alligatus , altera verò a pondere distractus , vi potentiae trahentis dupla distractioni resistat.

§. X X.

Nunc ut nostra methodo investigemus probabilitatem opinionis de structura vesiculari , revertamur rursus ad Cel. BERNOULLIUM , consulturi *Tabulam* Dissertationi ejusdem annexam: ex qua patet, cellulam unamquamque , si integram circularem figuram , seu potius sphaericam , in summa ipsius distentione acciperet , breviorē reddi posse , circiter una parte tertia totius suae longitudinis , quam haberet , ubi flaccesceret omninò , collapsis penitus vesiculae lateribus : Interea quum , demonstrante eodem Cel. BERNOULLIO , resistantia quaecunque sit minima , concedat solummodò vesiculam ejusmodi , (si eam ut planam consideremus) figuram adipisci , ex duobus segmentis aequalibus ejusdem circuli compositam , nunquam vero permittat in sphaeram attolli perfectam , quoniam vis absoluta movens , resistantiam infinites superare deberet ; Huic autem praeterea si accedat , quod Musculo flaccescente ejusdem fibrae cavae nihilominus pro parte aliqua licet parva , distentae esse debeant §. XVII. Constat ut opinor satis manifestè , vesiculas fibrarum (si existant) singulas , adeoque totum Musculum , in contractione summa , nunquam quidem partem unam tertiam de tota longitudine amittere posse , fieri id tamen propemodum. Haec igitur qui considerat , atque magnitudini contractionis per experimenta detectae §. XVIII. , quam proximè convenire videt ; deinde vero perpendit , Sphaerae quoniam triplicatam diametrorum inter se habent rationem , vesicam inflatam diametrum triplum habentem , septies & vicies majorem esse alia diametrum obtinente subtriplem , & proin vesiculas centum , aequale pondus ad eandem altitudinem , ad quam una major aliqua vesica istud attolleret , elevantes , & quarum singulae diametri ponuntur centies minores diametro illius majoris , decem millies minus fluidi postulare & spatii occupare ; adeoque secum reputat , quantus oriri deberet tumor , & quanta spirituum copia impendenda foret ,

si una fibra major cava eousque per inflationem decurtanda esset; inficias ire profectò nequit, majori multò cum probabilitate credi, fibras esse vesiculares, quam uno tractu factas; imprimis quum superficies rugosa & inaequabilis villorum, a LEEUWENHOECKIO visa, nec non similis corrugata fibrillarum forma in Musculis contractis, a Cel. ALBINO vario experimentorum genere, detecta, idem testari videantur.

Caeterum quod obiter notare licebit, si quis facillimo modo intelligere velit, vesiculam in sphaeram perfectam mutatam, uti modò diximus, parte circiter suae longitudinis tertia brevior reddi, assumat duntaxat cum Geometris, diametrum in circulo se habere ad ejus peripheriam uti 100 ad 314, adeoque ad ejus semiperipheriam uti 100 ad 157, & quum magnitudo illa, qua semissis peripheriae superat diametrum circuli, id est 57, aequalis sit habenda magnitudini ei, qua brevior fuit facta vesicula, postquam hujus longitudo in diametrum abierit, dividat 157 per 57, & inveniet quotum esse $2\frac{2}{3}$, si-ve circiter tertiam partem.

Interea simul ex dictis liquet; 1°. quum calculi gratia latera vesicularum flexibilia quidem, nequaquam vero ut quae extendi & elongari queant, assumpta sint, haec ipsa autem in corpore probabiliter plus minus per vires distendentes liquidi longiora reddi possint; quod ideò mirari non debeamus, si fortè aliqua cum observationibus, ratione magnitudinis contractionis, observetur differentia: accedit quod Musculorum extrema plerumque sint tendinea, imò & probabiliter inter vesiculas singulas spatia licet parva existant, quae utraque, siquidem non, ut caro, inflari possint, obstant, ne Musculi quicunque (partibus tendineis nimirum sub ipsa longitudine tota comprehensis) integra circiter una tertia parte decurtari queant; 2°. autem probabile magis videri cavernulas fibrarum esse vesiculas perfectas, quam cellulas basi ampliori inter se cohaerentes. §. XIX. An verò pro Musculorum diversitate, differant quoque vesicularum formae? aestimandum aliis relinquo.

§. X X I.

Supereſt quaefſtio de veſicularum formatione : putarunt cum Cel. BERNOULLIO multi eas fieri, quod fibrillae tranſverſae fibras, ope ligaturae cujuſdam, in aequalia internodia diſtinguant, & cellulas efforment ; ſed quum deficiant fibrillae tranſverſae, huic muneri aptae §. V., patet hujus ſententiae falſitas. Quod ſi autem conſideremus non ſolum ea, quae dicta ſunt §. XVI., verum & cogitemus, quod multis in Muſculis appareant interſectiones tendineae, ſimiles penitus illis, quae in Muſculo Recto abdominis obſervantur, valdè proſectò probabile videtur, fibras Muſculorum minimas, anguſtiores, ſicciores, duriores evadere diverſis in locis, ac naturam tendineae ſimilem induere, ſicque formare veſiculas.

§. X X I I.

Exhibui haecenus ſtructuram Muſculorum intimam, maximè verifiſimilem, explicavi & cauſas contractionem producentes; reliquum eſt reddere rationem, quomodo relaxatio ruruſus tam ſubitò & ad voluntatem fieri queat : quandoquidem verò reſtitutio haecce impoſſibilis omninò foret, niſi tollatur cauſa, contractionem efficiens, adeòque liquidum fibras diſtendens removeatur, utique liquidò apparet, quod antequam ad quaefita reſponderi poſſit, determinari primùm debeat exitus ſpirituum ex veſiculis fibrarum commodus & conveniens: de eo autem rectè definiendo qui ſolicitati ſumus, nequaquam nobis arridet ſententia illorum qui ſpiritus, peractis ſuis muneribus, ubi relaxandus eſt Muſculus, verſus cerebrum refluere ſtatuunt, & fibrillas ſic depleri autumant: Etenim quum omni momento temporis, quo vita durat, & ſecretio in corticali parte cerebri contingit, ſpiritus illi indefinenter per nervos propellantur, atque tam ad Muſculos, quam ad partes reliquas corporis deferantur, penitus proſectò abſurdum videtur credere, eosdem curſu naturali planè oppoſito, ad ſcaturiginem ſuam ferri ruruſus poſſe ; id quod ſanè clariuſ pateret, ſi modò plura de cerebri ipſius ſtructura nobis innotefcerent. Placet magis & accommodatior videtur eſſe

se via illa, quam monstrat Analogia, in auxilium a nobis vocata; hac quippe duce, si consideremus probè, quod arteriae quaecunque, exceptis fortè iis, quae in partibus glandulosis quibusdam, in vascula excretoria terminari videntur, in genere fere definant sic, ut vel in venas continuato canale abeant, vel osculis abscissis patentes, effundant humores aut in cavitates quasdam, aut & eos extra corpus eliminant; arteriis verò illis in venas abeuntibus, & vel sanguinem ipsum rubrum, vel serum solum, vel & solam lympham, vel denique humores lymphæ, per gradus infinitos, tenuiores vehentibus, quod continuatae sint semper, pro diversitate arteriosi canalis & liquidi contenti, perfectè ejusdem generis venae; arteriis autem dictis exhalantibus, atque liquidum contentum effundentibus, & majoribus & minoribus, respondeant ubique similiter venae resorbentes & majores, & minores vasa lymphatica dictae; Nervi autem, quod tandem benè considerandum venit, & ortu & distributione, pro arteriis minimis ultimi fortè generis commodè haberi possint: quidni probabile omni ratione videtur, quod quemadmodum arteriae, sic etiam nervi diversimodè terminentur, atque iisdem non solum per varias corporis partes distributis, sed etiam in fibras musculosas patentibus, respondeant vasa similia nervoso-lymphatica, ex cavitatibus fibrarum orta, spiritus ibidem effusos reducentia ex Musculis primò, ad vasa lymphatica majora, & ad venas dein, ad cor tandem, & hinc rursus ad cerebrum? nil profectò repugnat, quo minus rem ita se habere credamus, imprimis quum sic optimè caveatur magnum nimis & inutile dispendium liquidi nervei, omnium humorum nostri corporis maximè elaborati, & tam difficulter reparandi. Quid itaque? His positis, relaxabitur Musculus, statim ac desinunt urgeri a cerebro spiritus §. XVII., sublato quippe impetu majori, elater fibrarum, vis antagonistarum, sanguis in arteriis compressis quodammodò urgens, circumpositae partes extra suum locum atque tonum actae, compriment fibras Musculi contracti, expellent spiritus, restituent aequilibrium.

Ut ergo musculus contrahatur, requiritur ut spiritus influant copia atque proin celeritate majori, ac reduci queant per vasa
lym-

lymphatica nervosa; & ut contractus semel in eodem statu persistat, causa celeritatem augens ut agat continuò oportet.

§. X X I I I.

Satisfeci omnibus requisitis §. XII. enarratis; verum quum hucusque solùm respexerim ad nervos contractioni ministrantes, experimenta interim doceant, requiri non minus sanguinis arteriosi influxum illibatum, ut contractio fieri queat §. XI., restat ut primò inquiram quid sanguis praestet, deinde autem simul respondeam ad objectiones, contra sententiam hactenus expositam, fortassè cum aliqua specie formandas: Et quidem sanguinem articularum quod attinet, circa hujus usum jam plures in superioribus refutavimus opiniones, nec est, quod Egregius KEILIIUS, vesiculas non mera sanguinis vel spirituum mole, sed utriusque fluidi in fibrarum cavis commixti rarefactione distendi, demonstraturus, objiciat, naturam (cujus opera tam brevissima quam simplicissima methodo perficiuntur) duabus necessariis causis non usuram fuisse, si per unam efficere posset; probare enim prius solidè debuisset, sanguinem, ut causam efficientem adjuvantem, non autem alio modo, ad motum concurrere, tum dein ostendere, causam unam, quam nos in spiritibus ponimus, perficiendae contractioni non sufficere: Horum spirituum autem quantitatem si spectes, eam non deesse uti ipse fatetur, sic vim ad agendum requisitam si desideres, illam in vesiculari structura tam parvam sufficere, ut mirari debeamus, imò in contractione summa se habere posse ad resistentiam ut 1 ad 100000, quum liquidò constet ex *Tabella* Cel. J. BERNOULLII; dubium sanè nullum superesse poterit, quin vis activa sufficienter magna spiritibus quoque conciliari queat: ut adeò spiritus, ad provocandam inflationem fibrarum, sanguine tanquam requisito altero ad ebullitionem, nequaquam indigere videantur: Et ne mirari tantoperè quis opus habeat, vim istam adeò parvam, a BERNOULLIO calculi ope tam accuratè definitam, quae in spiritibus ad producendam contractionem sufficit, considerare juvat, ob similitudinem quae intercedit, & quoniam rem egregiè illustrat, Experimentum MARIOTTI, quod ad exemplum il-

lius

lius repetitum a multis, institutum aliquandò fuit in vase quodam ligneo satis amplo & capaci, intus pice probè obducto & aqua repleto, cujus superiori parti affixus erat tubulus quidam diametri valdè exilis, & altitudinis ferè 14 pedum, cui si infundebatur aqua, ita ut ad altitudinem satis magnam affurgeret, mirabili sanè spectaculo impediri nullo modo potuit, quin a vi aquae paucarum tantummodò unciarum certè, in tubulo minori contentae & prementis deorsum in aquam vasis majoris, elevaretur & fundus dolii superior, & unà cum eo 800 librarum pondus: En quantam vim exercuerit parva tantum quantitas aquae, sed certa ratione, ut agere possit, applicata. His obiter praemissis consulamus Experimenta, quidnam ex iis deducendum sit, visuri: inter haec autem occurrit statim illud, quod abscissa arteria, vel corrupta, pereat non solum motus in parte, sed & sensus; nec hoc unicum est, verum instituit experimentum aliud, licet diversum in finem, Cl. ASTRUCIUS (p) *Medicus Mompeliensis*; aperuit canem, ligavit paulò infra renes venam cavam, interposuit moram ut sanguis accumularetur, constrinxit tum & aortam, vidit partes posteriores paralyticas factas, & motu atque sensu destitutas: dubitavi primùm an idem foret eventus, si nulla congestio sanguinis facta fuisset; repetii ergo experimentum, & aperto canis abdomine, statim supra Iliacarum ortum, eodem filo constrinxi simul & aortam & venam ei respondentem cavam, erat in partibus infra ligaturam positis, nec motus amplius, nec sensus ullus, transfodi acu pedem, doloris vidi nullum indicium. Quid itaque inde docemur? Nemo sanè quum nesciat, arterias cum suo sanguine, neutiquam sensus instrumentum constituere, sensus porrò, quatenus nervis inest, nihil cum motu Musculorum commune possideat; utique constare videtur, vel sanguinis influxum naturalem perficere statum in nervis, quo apti ferventur; vel contrà influxum eundem naturalem sublatum, & circulationem in parte laesam, producere statum in nervis novum, quo inepti reddantur ad sensum motumque. Qualisnam vero hic status? an in vi-

ta

(p) Vid. *Manget. Theatr. anat. Lib. I. Cap. 4. p. 22.*

ta sublata consistit? non determino; existimans interim cum quaeri debere in vasis, ab arteriis venisque suae partis, oriundis, quibus copiosis instructi sunt nervorum fasciculi.

Interea nequaquam sententiae propositae repugnare, vel ulla ratione aliorum opinionibus favere video Experimentum COWPERI atque RIDLEY, quo per injectionem aquae in arterias, post mortem animalis, contractio Musculorum resuscitata visa fuit; experimentum quippe idem, quum ipse fecerim, referam quid viderim: Erat canis valdè mediocris magnitudinis, huic vivo ligaveram simul & aortam & venam cavam, aliquamdiu post mortem verò injeci in arteriam Iliacam, contracta adhuc ejusdem nominis vena, aquae ad centum ferè gradus calidae, primò parvam copiam, & lentè, impetu sanguinis naturali circiter aequali, in femore nullus motus apparebat, urgendo magis, plus aquae sensim immisi, tumere incipiebat femur & simul elevari, perrexì sic donec maxima quantitas injecta esset, intumuerat femur insigniter, & elevatum erat a mensa circiter ad altitudinem digitorum quinque & semissis; mensus sum deinde, in regione circiter media inter articulationem femoris cum tibia & ossa pubis, undique & femur tumidum & flaccidum alterum, ut sequitur: erat nempè crassities Musculorum flaccidorum $\text{---} 1 \text{ digit. } 4 \text{ min. tumentium \& contractorum vero --- } 3'' 8'''$; latitudo flaccidorum erat $\text{---} 2'' 2'''$, contractorum autem $\text{---} 3'''$; peracta mensura ista, circa femur utrumque, in regione jam dicta, circumduxi filum, cujus longitudinem in femore flaccido inveni esse $\text{---} 6'' 5'''$, contrà in tumido $\text{---} 8'' 7'''$; En quantum per injectionem fuerit aucta magnitudo: denudatis postea Musculis, inveni sub cute panniculum adiposum aqua plenum, discidi per transversum Musculorum carnem, pallidam penitus redditam, erat tunica cellulosa distinguens a se invicem partes aqua distenta, atque apparebant fasciculi fibrarum tumidi valdè & crassi, indicio & membranam cellulosa in hisce non minus ac reliquam scatere aqua, per arterias ramis suis lateralibus in eam patentes, effusa. Repe-
ti haec deinde in cane alio paulo majori, libera tamen vena & nullibi ligata, atque cum aqua frigida, contrà ac in casu prae-

cedenti; apparebant nihilominus omnia planè eadem. Adeò ut hinc nequaquam constet, Musculis, implendo arterias aqua, restitui posse contractionem, excitando iterum causas naturaliter eam producentes; liquidum quippe, inter fibras ubique effusum, intumescere fecit Musculos, breviores reddi, partes annexas firmas elevari.

Sunt denique & Clarissimi in arte Viri, qui sentiunt sanguinem ut causam efficientem simul ad contractionem Musculorum concurrere; idque sanè meritò atque optimo jure: Considerantes enim series infinitas decrescientium vasorum, diversosque admodum eorum fines, pro diversis partibus in quibus terminantur, valdè probabiliter concludere videntur, arterias minimas in finibus suis ultimis evadere simillimas nervorum fibrillis; adeoque in Musculis, eadem ratione ac nervi §. XV. arterias desinere posse in fibras motrices, iisdem ex nervis oriundis similes, vel & in fibras ex nervis ortas patere: ex quibus proin colligitur haud difficilè, quod in contractione Musculorum, ubi premuntur aliquantùm arteriae, atque liquidum contentum tam ad anteriora quam retrorsum urgetur, crassiora repellantur, subtilissima verò in exilissimos canales, & hinc in fibrillas premantur; atque hoc modo, nervos quidem primùm movere, horum autem actione arterias ad idem peragendum & juvandum disponi. Agnosco maximam verisimilitudinem inesse huic sententiae, utpote quae commodè cum experimentis modò recensitis subsistere potest.

Caeterum ex dictis non obscura intelligitur ratio, cur Cl. MORGAGNUS, prout testatur D. MICHELOTTI (q), tam in cadaveribus humanis, quam in canibus recens interfectis, injiciendo aquam in cruralem arteriam, motum prorsus nullum observare potuerit; quum enim magna aquae requiratur quantitas, is fortè sufficientem copiam non immittendo, eventu sperato felici frustratus fuit.

Nec minus praeterea evidens est, quod obiter notandum venit, Experimentum ARTRUCHI maximè obstare sententiis supra

me-

(q) In *Apolog. ad Hermann.* p. 21.

memoratis §. XIV. Clarissimorum Virorum DE GORTER & DAN. BERNOULLII, quandoquidem posita utriusque hypothefi, ligata licet arteria fit cum vena, contractio nihilominus fieri posse deberet.

§. X X I V.

Verum enimvero an Musculus in contractione positus pallet? Profectò si verum fatear, ubi pallor notabilis intelligitur, quominus assentiri queam, moveor dubiis quibusdam paucis, quae, etsi levioris fortè momenti esse possint, in medium tamen afferre licebit: id quod paucis potero: Omnis nimirum, quantum novi, affirmandi ratio observatione duntaxat nititur illa, qua videmus corda ranarum, anguillarum, nec non minorum aliquot animalium, momento contractionis pallorem concipere, quum tamen idem non adeò constet nec in cordibus animalium majorum, nec in Musculis reliquis aliarum partium corporis; feci experimentum in cane, denudavi in femore Musculos, vidi contractos, pallorem nullum: An ergo in corde, praecipuè animalis cujusdam minoris, is oritur, quod sanguis in ventriculis tempore diaстоles contentus, fortè per parietes tenuiores colorem suum ostendet, qui sanguine per systolen expulso dispareat? Observavi saltem in anguilla, cor, dum vita adhuc maximè vigeret, tempore systoles notabiliter minui, & totum pallefcere, incipiente autem languore, minus contrahi, pallere minus, donec tandem rubrum penitus maneret; incidi tum, & vidi sanguinem concretioni proximum in thalamo haerere: An verò magis pallor cordi contracto est proprius, ob structuram ipsius singularem, qua differt a Musculis aliis, ex fibrarum contorsione mirabili natam, cujus ope sanguis arteriarum sui parenchymatis, in systole exprimitur quidem, introitus vero sanguini novo, vel per eandem causam, vel & simul per clausa arteriarum coronariarum foramina negatur? Suspicio certè est maxima: nisi fortasse, ob rationes brevitatis gratia hic non adnotandas, valvulas semilunares cordis sinistri tempore systoles, coronariarum arteriarum orificia claudere non posse existimes. At inquires, motum sanguinis acceleratum per Musculorum actionem, testari illius expulsionem, adeoque horum pallorem: Verum poterit

quoque motus idem celerior reddi, si in contractione, 1°. comprimantur & relaxentur vicibus alternatis vasa vicina, tum 2°. venae Musculorum ipsorum, utpote minus resistentes quam arteriae, comprimantur, evacuentur, sanguis verò eo ipso in arteriis, paululum simul coarctatis, haerens, per vasa translucendo, carni musculosae rubrum suum colorem concilians, ibidem sistatur, retardetur, qui, dum relaxantur Musculi, in venas depletas, & ferè vacuas, pleno impetu irruens, majorem in suo motu concipiat celeritatem. Unde & facilè quis reddere posset rationem, cur in Tetano violento contractioni penitus immoriantur Musculi, nec postea rursus relaxari queant, sed rigidi subsistant; sanguis quippe in illo terribili morbo per diuturnam contractionem accumulatus, in membranam cellulosa inter fibras effusus, inflammationes pariens, idem fortè efficit, quod aqua per arterias injecta §. XXIII., nec Musculos deinde restitui permittit; nisi quis velit, id potius fieri, quod vesiculae fibrarum motricium, nimis fortiter & diu distentae, suum tonum amittant, & quum idem Antagonistis contingat, causae restituentes §. XXII. sint sublatae.

An autem compressio venarum, obstans depletioni vasorum lymphaticorum, & hac ratione spiritus in cellulis fibrarum sistens, simul juvat, ut Musculi valdè & diu vigorari possint, cum minimo tamen spirituum dispendio?

§. X X V.

Transeo ad ea, quae nobis opponi possent argumenta; inter haec autem quum multa sint tantum parvi momenti, ad unicum, quod est praecipuum, duntaxat respondebo: In anterioribus scilicet, quum Musculos contrahi posuerim, ex copia majori spirituum implentium fibrillas §. XVII., indeque manifestum sit, in contractione necessariò molis incrementum contingere deberè; id contrà a multis fieri negatur: hoc autem ne fortè cuidam absurdum videatur, notare juvat, augmentum molis Musculorum aestimari non posse ex tumore, qui, dum contractio contingit, in quibusdam manifestò observatur, & vel ab ipso STENONE assumitur, propterea quod necesse sit Musculum in crassitie tantum augeri, quantum minuitur ejusdem longitudo; verum,

num quaeri duntaxat, an praeter incrementum abbreviando or-
 tum, Musculis nullum aliud accedat? Tentavit hoc per Expe-
 rimentum evincere GLISSONIUS in *Tractat. de Ventriculo & In-*
test. p. m. 191. cujus verba haec sunt: „ Paretur tubus oblon-
 „ gus vitreus satis capax & idoneus, cujus superiori & exteriori
 „ lateri prope orificium inferatur alius erectus instar infundibuli.
 „ In orificium majoris tubi vir robustus & laceratosus nudum
 „ brachium totum immittat, & dein orificium tubi undique
 „ circa humerum loriceretur, ut nihil aquae inde effluat: demum
 „ per infundibulum tantum aquae quantum vitrum capiat infun-
 „ datur, & insuper aliquid aquae in infundibulo superemineat.
 „ His peractis jubeatur operator per vices, modo omnes brachii
 „ Musculos simul fortiterque vigorare, modo omnes remittere.
 „ Tempore vigorationis aqua in tubulo subsidit, tempore remis-
 „ sionis altius in eodem assurgit. Unde liquet Musculos tensos
 „ seu vigoratos non eo tempore inflari aut intumescere; sed po-
 „ tius minorari, contrahi & detumescere. Si enim inflarentur,
 „ aqua in vitro altius ascenderet, nedum descenderet. Objecit
 huic argumento multa MANGETUS (r) & quem recenset ASTRU-
 CIUS, quorum praecipua sunt: 1°. quod non liqueat enarratum
 experimentum a GLISSONIO ipso institutum fuisse; 2°. quum
 omnes brachii Musculi vigorari nequeant, detrahi portioni la-
 xatae, quod turgenti additur; 3°. per contractionem depleri va-
 sa venosa & lymphatica fibris accumbentia, ideòque Musculos
 dum agunt, majus non requiri spatium, imò forsitan, si plus
 expellatur quam additur, spatium minus, quam antea illis ne-
 cessarium erat. Certè si benè haec perpendamus, non parvi pon-
 deris esse videntur; optandum interim foret, quum res sit ma-
 gni momenti, & multis dubitandi locus relinqui posset, expe-
 rimentum illud cautè iterari, quod tamen ob difficultates,
 quas sibi conjunctas habet summas, haecenus factum fuisse, non
 novi. Quidquid sit non opus est tamen ut haereamus, superest
 argumentum illud *Borellianum*, Musculum contractum ex
 corpore superaddito turgere, evidenter demonstrans; in Masse-

E 3.

rere:

 (r) In *Theat. Anat.* Lib. 1. c. 4. p. 25 & 37.

tere scilicet, ubi dentes fuerint satis fortiter ad invicem adducti, ita ut cedere amplius nesciant, si magnus fiat mordendi nifus, deprehenditur tumor novus, nec tamen ex longitudine imminuta ortus. Fortè & aliquid probat, observatio Cl. WINSLOW (s), qui animadvertit, quod brachio modicè flexo si articulus cubiti figatur, & accedat vis ad extendendum major, v. gr. a pondere ad extremum manus appenso, Musculi flexores in proportionem resistentiarum magis magisque tumeant, cubito interim immoto manente.

§. X X V I.

En removi objectiones, & confirmavi quae in anterioribus dicta fuere: interea, quum fuerit aliquis, contractionem Musculorum ex remisso spirituum motu oriri, existimans, non incon-sultum esse videtur, examinare hic loci quoque breviter ejusdem opinionem, quae nititur imprimis tali Lemmate; quod scilicet, *quo tardior sit motus fluidi per canalem quemcunque decurrentis, eo major, cacteris paribus, sit pressio lateralis, & vice versa.* Cujus demonstratio exhibetur sequens: „Omne fluidum per ca-
„nalem decurrens duplici gaudet motu, uno axi parallelo, al-
„tero lateribus perpendiculari; hunc vocamus motum lateralem,
Fig. IV. „illum progressivum. Sint $\alpha \epsilon$, $\alpha \omega$ canalis parietes, sit $\epsilon \phi$ ejus
„axis: ponamus motum lateralem esse $\parallel \epsilon \alpha$, progressivum \parallel
„ $\epsilon \phi$: erit diagonalis $\epsilon \epsilon$, linea descripta a fluido, quod a dua-
„bus hisce viribus motus impressos recepit. Minuatur motus
„progressivus; fiat $\parallel \epsilon \chi$; fluidum impinget in s : minuatur
„iterum, & sit $\parallel \epsilon \lambda$; motus fluidi erit per $\epsilon \gamma$. Quoniam
„ictus magnitudo, ut sinus anguli incidentiae; impetus in ϵ , s
„& γ erunt, ut anguli $\epsilon \epsilon \alpha$, $\epsilon s \alpha$, & $\epsilon \gamma \alpha$, seorsim: sed ang.
„ $\epsilon s \alpha > \epsilon \epsilon \alpha$, & ang. $\epsilon \gamma \alpha > \epsilon s \alpha$. Impetus ergo in s major erit,
„quam in ϵ ; & in γ major quam in s . Hinc luculenter pa-
„tet, quod diminuto motu in directione $\epsilon \phi$, vis etiam & pres-
„sio, quae in canalis latera exercetur, augebitur. q. e. d.

Jam verò sciendum est, motum fluidi per canalem decurren-
tis, retardari posse duobus praecipuè modis; 1°. vim impellen-

(s) Vid. les Memoires de l'Académie des sciences de Paris de l'ann. 1720.
tem

tem minuendo ; 2°. orificium canalís obturando , sicque resistentiam augendo : in casu posteriori verum est pressionem lateralem fieri majorem , contrà in priori nequaquam ; interim *demonstratio* adducta , quum talis sit , ut nullo modo exinde pateat , ex quam causa , motus liquidi progressivus imminutus poni debeat , sed casui utrique promiscuè accommodari queat , haecce fortè ratio fuit , cur Ornatissimus Autor , lemma suum ad motus Musculorum applicando , contractionem & fieri posse crediderit , ex motu spirituum , *ob vim pellentem imminutam* , retardato , quum tamen , uti jam diximus , visurgens minor , nequaquam majorem reddat pressionem lateralem . Id vero ut clarius pateat , & simul constet , in quonam *demonstratio* deficiat ; concipiatur tubum $\alpha \varepsilon \omega$ obturatum esse in $\varepsilon \omega$, urgeri autem liquidum aliquod vi quacunque ab ϱ versus ϕ ; quid fiet ? motus progressivus retardabitur quidem , sed quum liquidum resistat , & reagat vi qua premitur aequali , aucta pressione , poterit illi communicari vis quaecunque magna , quae nunc premendo tantum agit , quodsi vero in motum erumpere posset , celeritatem haberet maximam : demonstratum verò quum sit à Cl. MICHELOTTI (t) liquidum in canali quocunque premere inter se , & superficiem interiorem canalís in omnibus punctis , aequabiliter ; patet credo manifestè , liquidum in tubo $\alpha \varepsilon \omega$, sub conditione posita , si vi sua in motum erumperet , aequali celeritate ferri debere versus anteriora , ac per latera , seu quod idem est extra canalem , motum progressivum v. gr. $\varrho \mu$, fore \equiv motui laterali $\varrho \nu$, & secundùm leges mechanicas motu rectilineo in compositum resolutò , linea quae movendo describeretur \equiv diagonali $\varrho \beta$. Ponatur dein alio in casu , non impedito exitu in $\varepsilon \omega$, imminui vim pellentem in $\alpha \alpha$, idem sanè fiet , ac si vis dicta maneret eadem , minor autem evaderet resistentia ad $\varepsilon \omega$, quum igitur liquidum non tam validè resistat , sed pressioni urgenti minori cedat , nequaquam recipere amplius poterit vim tam magnam , ac quidem in casu priori , & movebitur tantum tardè ; interim verò , quum Propositio illa a Cl. MICHELOTTI demonstrata vera sit semper ,
etiam-

(t) In *Dissertat. de separat. fluid.* p. 67.

etiamfi ad finem canalis minor evadat resistantia, imminuto motu progressivo, minor etiam fiet motus lateralis, & erit nihilominus $e\delta = e\pi$, diagonalis autem, per quam actu fertur, $= e\eta$.

Nullius autem momenti est objectio, quasi pressio lateralis, utroque in casu, aequè magna foret, ideò quod ictus magnitudo sit ut sinus anguli incidentiae, juxta sententiam nostram verò, anguli incidentiae sint semper sibi invicem aequales; considerandum est enim, verum quidem esse, quod pro sinuum diversitate, variet quoque virium magnitudo, *si existat semper eadem celeritas*; hac vero posita diversa, sub angulis iisdem, ut quadrata celeritatum sic erunt vires, seu vis in β erit ad eandem in η ut $e\beta^2$ ad $e\eta^2$.

His intellectis, patet clarè error ab Autore, caeteroquin doctissimo in *demonstratione* commissus, dum motum progressivum imminui supponit, eodem interim manente motu laterali; nec est igitur, quod ex suo lemmate ratione probabili concludat, contractiones Musculorum fieri, dum tardiori motu feruntur spiritus, *ex vi imminuta ad principia nervorum pellente*.

§. XXVII.

Ad finem jam propero, explicaturus duntaxat breviter quaedam adhuc Phaenomena, quae circa motus Musculorum observantur, atque ex antecedentibus haud difficulter intelliguntur: & quidem

1°. Evidens est ratio, cur Musculorum motus tam distincti fieri queant? Nervi enim quum content ex fibrillis minoribus ab ortu usque ad finem disjunctis, absque ulla confusione secundum voluntatem spiritus, ad Musculum modò hunc modò illum, mitti poterunt.

2°. Patet ex *Tabella* saepe commemorata Dissertationi Cel. BERNOULLII adjecta, cur elevando & sublata retinendo maxima pondera, semper oriatur tremor; quum ibidem calculi ope demonstratum inveniat, vires absolutas vesiculas dilatantes, non sequi rationem vesicularum earundem successivae expansionis, seu quod idem est respectu virium, non incrementum eodem mo-

modo resistantiarum momenta, quam vesicularum dilatationes; verum vim absolutam, rationem ad resistantiam habere minimam, quando dilatio vesiculae, adeoque elevatio ponderum fuerit valde parva, hac vero existente maxima, rationem obtinere multo maiorem; sic ut angulus semidilatationis A ad Fig. V. extremum vesiculae, ubi fuerit valde acutus & tantum 30', vis dilatans absoluta ad resistantiam se habeat ut 1 ad 22900000, contra dum angulus est maximus & 85° existit, ratio dicta multum increseat & sit ut 1 ad 900000: adeoque homo valde elevata retinendo ingentia pondera, vires impendere debeat summas, & ne quidem vesicularum dilatationi proportionales, ob quas igitur pro momento interdum deficientes forte, fit tremor. Interim intelligitur ex eadem *Tabella*

3°. Cur nihilominus homines pondera maxima elevaturi, conatus majores in proportionem, sibi adhibere videantur, dum primum de humo tolluntur onera, quam ubi jam aliquantum sublata adhuc altius suspendi debent? propterea scilicet, quod elevatio tanto minus sensibilis existat, quanto momentum resistantiae majus est vi motiva dilatante fibrillas, illud autem ad vim motivam eo maiorem habeat proportionem, quod minor fuerit angulus dilatationis ad extremum vesiculae (per num. 2); atque proinde homines considerantes, quod, dum primum tollere incipiunt, ad magnos nifus elevationes tamen sint minimae, crescant autem hae in ratione valde magna, ubi altius tollere conantur, existiment suspensionem reddi faciliorem, ubi jam aliquantum facta fuerit, licet revera summae in proportionem impendantur vires.

4°. Liquet etiam facile ratio roboris in hominibus diversi; pollebunt quippe viribus majoribus, 1°. Illi quibus maxima, ad fibras distendendas, est copia spirituum; 2°. autem fibras ipsas habent justae firmitatis, haud nimis parva vi mutabiles ita, ut se ipsis longiores fiant; 3° denique ad juncturas ossium instructi sunt tuberibus magnis, corrigentibus obliquitatem directionis, atque efficientibus id, quod patella in genu, & ossa sesamoidea ad articulationes digitorum.

F

5°. Qua-

5°. Quare post cursus violentos, vel labores strenuos, dolent ferè semper Musculi rursus contrahendi, imprimis qui plurimum agere debuerint? videtur quippe id fieri, quod latera fibrarum nimis distracta, praecipuè ubi frigus supervenerit, excitent doloris sensum, similem valdè illi, qui oritur ex compressione valida externa Musculi contracti: fortè etiam causa est inflammatio levior in tunica cellulosa Musculorum nata, & consumpta pinguedo.

An vero lassitudinis per motus nimis magnos ortae causa est, quod partes sanguinis tenuissimae perspirando exhalaverint? videtur saltem malè eam tribui dispendio spirituum per contractiones Musculorum successivas facto; quum constet spiritus continuò reaffundi sanguini §. XXII. & dum sic rursus ad secretionem applicantur cerebro, probabile admodum sit, quod proprium circulum absolvant; Musculi autem praeterea contrahendo & relaxando se per vices, sanguinem attenuando, cum non solum aptum reddant ad generationem novorum spirituum, verum etiam motus celeritatem augendo, copiam illius majorem intra datum tempus ad cerebrum mittant. Sed

6°. Quomodo tandem ex inanitione nimia fit convulsio? quaestio est difficillima certè: cogitavi saepius an explicari possit exinde, quod, dum per haemorrhagiam maxima perditur sanguinis copia, & proin motus illius qui adhuc superest valdè imminuitur, ex pressione fortè partium vicinarum inaequali, vel alia quacunque ex causa, oriatur resistentia quaedam levis, in vasis deferentibus sanguinem ad Musculum antagonistam unum partis alicujus, quae ob impetum sanguinis valdè parvum non superabilis, impediat illius influxum, atque Musculum reddat paralyticum, ineptum amplius ad impediendum contractionem antagonistae alterius, cujus proinde sequens contractio producat resistentiam in suis vasis, liberè interim affluente rursus sanguine ad Musculum prius paralyticum antagonistam alium, & ex hac causa iterum contractum, dum flaccescit alter. Sed quid multa? non conveniunt haec Phaenomena, prout apparet, si ritè observetur; Animal moribundum ex
san.

sanguinis profluvio quiescit prius diu, pallet atque frigescere incipit, momento post trahit membra, jactat se & vagos quoscunque motus edit, quiescit rursus, fiunt eadem, & moritur: an ergo ex imminuto valdè, nondum tamen profusus deletò sanguinis motu, colliguntur in nervis spiritus, qui succedente frigore propelluntur semel atque iterum in Musculos, & artuum varios motus producant? est saltem admodum probabile. Ast

7°. Quid dicendum est de contractione superstite in corde exsecto quorundam animalium? credo eam mortalium neminem explicare posse; miramur id quod observamus, sufficienter autem non intelligimus: unicum illud dici posset, in animalibus id praecipuè singulare, ex constanti observatione obtinere, quod quò minus illis sit cerebrum, quò major autem caeteris paribus medulla spinalis, tantò diutius non solum se moveat cor, verum & saepius in frustra dissecti corporis partes. Differt quidem in eo maximè ab animalibus homo, utpote habens cerebrum, inter omnia viventia ratione mobilis totius, maximum, inest tamen & cordi ipsius irritabilitas quaedam faciens, ut non diu post mortem, utcunque ad contractionem adhuc stimulari possit. Et profectò videtur, irritabilitatem illam nemini explicandam, unà cum motu peristaltico Intestinorum aliquamdiu in mortuis adhuc superstite, maximo cum bono, a summo Conditor, inditam esse corporibus nostris adeò fragilibus. Est scilicet corpus animale machina quaedam, in eo duntaxat ab omni reliqua, diversa, ut sit verum perpetuum mobile, duplex habens Principium activum, unum alterum movens: Primum est cor, determinans actualitatem eorum, quae per cerebrum fiunt; alterum existit cerebrum ipsum, causa rursus actionum cordis: suspendas pro momento actionem unius, vel ponas impedimentum ne horum unum agere possit, quiescet tota machina, cum fluidis suis non corruptis, & benè constitutis omnibus solidis,

dis, deficit tantum primum illud mobile, & est status idem, qui in horologio, ex causa quadam externa quiescente pendulo; deducatur duntaxat in motum rursus v. gr. cor, movebit hoc omnia reliqua & erit restituta vita: atqui poterit id fieri, ut in summis animi deliquiis, naturaliter quidem, dum Intestina chylum vel lympham ad venas mittunt, sanguis autem cor dextrum ingressus, illud irritat; ex arte autem pluribus modis, uti cum aqua frigida irpersa corpori, quae existens causa contractionis vasorum, efficit ut repellantur fluida nondum coagulata, versus interiora, ad cor: Nituntur hoc fundamento modi adhuc multi alii, argumento sint experimenta in Anglia capta, ubi hominibus sub aqua suffocatis reddidere vitam. Sic cavit Deus, ne ex levi quacunque causa nobis statim moriendum esset: fortè applicando dicta ad homines ex vaporibus tam noxiis in fodinis, nec non cellis subterraneis a longo tempore clausis, morientes; magno emolumento esse possemus generi humano. Caeterum alius adhuc & non minor certè usus, ex irritabilitate simili, quae inest toti corpori, enascitur Oeconomiae animali; advertit enim illius ope statim natura, applicatum esse aliquid, vel ingestum noxium corpori, aut in eo natum, per febrim dein subigendum vel eliminandum; quare & non immeritò dicitur, quod natura sit sui ipsius conservatrix, cui ut Moderator affidet Medicus.

§. XXVIII.

Exhibui quae pertinent ad historiam motus muscularis causae, & satisfeci proposito; vires enim instrumentales Musculorum quod attinet, seu leges mechanicas secundum quas Musculi diversis modis partibus firmis affixi, contractionis ope tantos tamque varios motus in corpore efficere possint, quum hae longè aliam uberiolemque disquisitionem postulent, eas huc simul referre scopus minimè exigit: adde quod argumentum illud, adeò fusè certè & accuratè, post FABRITUM *ab* AQUAPENDENTE, tractatum
ab

ab Eximio BORELLO, ut & a Cl. PEMPERTONO in *Introductione ad Myotomiam reformatam* COWPERI, planè jam exhaustum esse, nec nisi ab exercitatissimis in Mathesi Viris illi aliquid addi posse videatur. De reliquo autem si quis fortè sit, qui auxilia mechanica atque rationem formæ, nexus, situs, magnitudinis &c. in Musculo quocunque singulari cognoscere desideret, investigare hæc poterit facilè, dummodo perspecta habeat generalia illa, a BORELLO memoriae prodita, eaque applicet usui, ex Anatomia cognito, cui destinatus est Musculus in hac vel illa corporis parte, simul benè hunc in finem consideranda, locatus. Exemplum praebeat Trochlearis oculi, qui ab optici nervi foramine ortus, ad canthum majorem procedens, ibidem orbiculum quendam transiens, inde retrorsum & exteriora versus descendens, mediae summae parti globi inferitur; is quippe Musculus quum globum oculi vertat, sic ut pupillam deorsum ad prominentem sub cantho minore genam dirigat, huic autem actioni accommodatus minime extitisset, si a suo principio rectà ad locum insertionis in globum delatus fuisset, necessariò indigebat trochlea, quae directionem corrigeret: quaeratur verò, cur itaque idem ille Musculus non ex ipso cantho majori oriatur, & trochlea dirigente careat? in promptu est ratio, siquidem inversio globi maxima requirebatur, cui non sufficeret Musculus tam brevis ex cantho oriundus, sed potius major quidam ex fibris longioribus constans.

En nunc omnia, quae tradere constitueram, gavifurus si ritè a me tractata fuisse cognoverim.

F I N I S.

A D N E X A.

I.

In morbis inflammatoriis , caeteris paribus , praestaret arteriam secare quam venam.

I I.

In variolarum morbo , curam antiphlogisticam opportuno tempore , cum successu adhiberi posse credo.

I I I.

In Plethora nec sudore , nec abstinence , impetratur id quod venaesectione.

I V.

Haec unquam absque Peripneumonia saeva Pleuritis.

V.

Sanguis densus , facile concreescens , & simul blandus est optimus.

V I.

Humor per glandulas secernendus differt a secreto.

V I I.

Saccharum nec non mel vermibus potius necandis quam alendis inservire existimo.

V I I I.

Refrigeratur in pulmonibus sanguis.

I X.

Bilis in intestina effusa , chylo acescenti resistit.




Fig. I





Fig. II



Fig. III






Fig. IV





Fig. V

